

Suliassaqqarfimmumut 70 - 72 Ineqarnermut Attaveqaasersuutinullu Naalakkersuisoqqarfik, nassuiaatit

Oqaasertaliussamut nassuiaatit makkua ilanngunneqarnissaat qinnutigineqarpoq:

“Nr. 4.

Nuummi Ilulissanilu nunani tamalaani mittarfiit ammarneqarneranni Kalaallit Nunaat nunanit tamalaanit soqutigineqarnera annertusitinneqarpoq. Nunami pissutsit atuuttut Kalaallit Nunaata soqutiginninneqarnernik eqqumaffigineqarneranillu sakkortusaataasimapput. Kalaallit pigisanik aalaakkaasunik, taakkununggalu pigisat aalaakkaasut najugaqqarfittut atorneqartut ilanngullugit, niueruteqarneranni niuerfik aammalu aningaasalersuinerumut periarfissat pioreersut, aningaasaqarnerup annertussusaa kiisalu Kalaallit Nunaanni aningaasarsiat qaffasissusaat tunngavigalugit akinik aalajangersaasarneq neqerooruteqartitsisarnerlu annikitsunnguupput.

Avataaniit pigisanik aalaakkaasunik, nalinginnaasumik Kalaallit Nunaanni aningaasalersuinerumi atorneqartartut avaqqullugit pisisoqartalernissaa pigisanik aalaakkaasunik niueruteqarnermi oqimaaqatigiiffiusunik pioreersumik nikisitsinissamut annertuumik ulorianartorsiortitsisussaavoq, aammalu akit aalajangersarneqartarnerinik neqerooruteqartitsisarnermillu, inuiaqatigiit pigisanik aalaakkaasunik pigisaqarnissamut attartornissamullu periarfissaannut naapertuutinngitsunik pilersitsiviusussaalluni.

Pisisoq danskisut innuttaassuseqartinnagu, imaluunniit pisisoq suliffeqqarfiuppat, suliffeqqarfinnit danskisut innuttaassuseqartunit tamakkiisumik pigineqanngitsoq nakkutigineqanngitsorluunniit Kalaallit Nunaanni pigisamik aalaakkaasumik pisinissamut aamma nunaminertamik atuisinnaatitaaffimmik pissarsinissamut maleruagassiuussinissamut nakkutilliinissamullu tunngaviliinissaq siunnersuummi siulertarineqarpoq. Siunnersuummi ilaatigut Kalaallit Nunaat ataatsimut isigalugu imaluunniit illoqqarfinni nunaqqarfinniluunniit aalajangersimasuni pigisanik aalaakkaasunik pisinermi, avataaniit annertuumik aningaasaliissutaasunit Kalaallit Nunaanni pigisanut aalaakkaasunut akinik aalajangersaasarneq neqerooruteqartitsisarnerullu nikitsinneqannginnissaanut tapersiinissaq siunertarineqarpoq. Assersuutigalugu nunanit allaniit inissianik imaluunniit illunik inuussutissarsiorfiusunik pioreersunik pisisoqarneranit akinik aalajangersaasarneq neqerooruteqartitsisarnerlu sunniuteqarfigineqarsinnaapput, taamaalillunilu innuttaasut maani najugaqqartut inissianik imminnut pilersorsinnaanerinit aammalu suliffeqqarfinnik inuussutissarsiorfiusunik pilersitsisinnaanerinit killiliisinnaallutik akitsorsaataasinnaallutillu. Ullumikkut nunanit allamiut Kalaallit Nunaanni pigisanik aalaakkaasunik pisinnaanerinit, imaluunniit Kalaallit Nunaanni nunaminertanik atuisinnaatitaalernissaannut maleruagassanik tamanut atuuttunik soqanngilaq killilersuisoqqaranilu.

Inuit danskisut innuttaassuseqartut, aammalu ingerlatseqatigiiffiit aningaasaliiffiusut taakkunannga 100 %-inik pigineqartut, Kalaallit Nunaanni pigisanik aalaakkaasunik

killilersuiffiunngitsumik pisisinnaassasut, imaluunniit Kalaallit Nunaanni nunaminertanik atuisinnaatitaassasut siunnersuutigineqarpoq.

Siunnersuutigineqarpoq, inuit danskisut innuttaassuseqanngitsut, aammalu ingerlatseqatigiiffiit aningaasaliiffiusut taakkunannga 100 %-inik pigineqartut Kalaallit Nunaanni pigisanik aalaakkaasunik pisisinnaassasut, imaluunniit Kalaallit Nunaanni nunaminertanik atuisinnaassasut,

- 1) inuk Kalaallit Nunaanni aalajangersimasumik najugaqarpat aamma inuit nalunaarsorsimaffianni nalunaarsorneqarsimappat, tamannalu ukiut siuliini marlunni amerlanerusuniluunniit pisimappat, aamma
- 2) Kalaallit Nunaannut tamakkiisumik akilersaarsinnaatitaappat, aammalu ukiut siuliini marlunni amerlanerusuniluunniit Kalaallit Nunaannut tamakkiisumik akileraartussaataasimappat.

Siunnersuutigineqarpoq, aningaaseriviit, pensioninik katersuviit aammalu realkredit-imik taarsigassarsiniartarfiit, Danmarkimi, Kalallit Nunaanni imaluunniit Savalimmiuni najugaqartut, aammalu aningaasalersuisarnermut inatsimmut imaluunniit realkredit-imik taarsigassarsiat aamma realkredit-imillu pappiaraatinut nalilinnut il.il. inatsimmut ilaatinneqartut Kalaallit Nunaanni pigisanik aalaakkaasunik pisisinnaassasut, imaluunniit Kalaallit Nunaanni nunaminertanik atuisinnaatitaassasut.

Tamatuma saniatigut Kalaallit Nunaanni pigisanik aalaakkaasunik pisinissami, imaluunniit Kalaallit Nunaanni nunaminertamik atuisinnaatitaanissami Naalakkersuisut allakkatigut akuersissuteqarnissaat piumasarineqarpoq. Siunnersuummi Naalakkersuisut qanoq ilinerani Kalaallit Nunaanni pigisamik aalaakkaasunik pisinissamut, imaluunniit Kalaallit Nunaanni nunaminertamik atuisinnaatitaanissamut akuerineqarnissamik qinnuteqaatinut itigartitsisinaanersut itigartitsinermiluunniit nalunaaruteqarsinaanersut, imaluunniit akuersisinaanersut maleruagassiuunneqanngilaq.

Siunnersuut pisortanut aningaasaqarnikkut allaffissornikkulluunniit kinguneqassanngitsoq naliliisoqarpoq. Naliliineq malillugu Kalaallit Nunaanni pigisanik aalaakkaasunik pisinissaq, imaluunniit Kalaallit Nunaanni nunaminertamik atuisinnaatitaanissaq pillugu suliat, Naalakkersuisoqarfimmit akuersissummik pisariaqartitsiffiusut killeqartuinnarnik amerlassuseqarput, aammalu aningaasaliissutaareersut iluanni aqunneqarsinnaasussaallutik. Naliliineq malillugu siunnersuut imminermi aningaasaqarnikkut allaffissornikkulluunniit kinguneqartussaannngilaq.

Naliliisoqarpoq, siunnersuut Kalaallit Nunaanni pigisanut aalaakkaasunut akit pilersinneqartarnerinut neqerooruteqartitsisarnernullu pioreersunut sunniuteqassanngitsoq. Maanna pigisanik aalaakkaasunik pigisaqartut siunissami pigisaminnik aalaakkaasunik qaffasinnerusunik iluanaaruteqarlutik tunisisinaanissamut periarfissaminnik annaasaqarnissaat pisussaannngitsutut oqaatigineqarsinnaanngilaq.

Naliliineq malillugu Kalaallit Nunaanni pigisanik aalaakkaasunik pisinissaq, imaluunniit Kalaallit Nunaanni nunaminertamik atuisinnaatitaanissaq pillugu suliat, Naalakkersuisoqarfimmit akuersissummik pisariaqartitsiffiusut killeqartuinnarnik amerlassuseqarput, taamaattumillu inuussutissarsiortunut aningaasaqarnikkut allaffissornikkulluunniit annertuunik aningaasartuuteqarfiusussaanatik. Naliliisoqarpoq, siunnersuut avatangiisinut, pinngortitamut inuillu peqqissusaannut kinguneqassanngitsoq.

Naliliineq malillugu siunnersuut Kalaallit Nunanni pigisanut aalaakkaasunut akinik pilersitsisarnerit neqerooruteqartitsisarnerillu patajaatsumik eqqoriaruminartumillu ingerlaannarnissaannut iluaqutaassasoq, aammalu avataaniit pigisanik aalaakkaasunik pisisoqarnerata kingunerisaanik Kalaallit Nunaanni nunaqavissut pigisanik aalaakkaasunik pigisaqarnissamut attartornissamulluunniit periarfissaannik killilersuinnginnissamut akitsorsaannginnissamullu iluaqutaassalluni.

Naliliineq malillugu siunnersuut allanut annertuunik kinguneqartussaannngilaq.

Siunnersuummi aalajangersakkanut ataasiakkaanut nassuiaatit:

Imm. 1-imut

Siunnersuutigineqarpoq, Kalaallit Nunaanni pigisanik aalaakkaasunik pisinerup inatsisinik tunngaveqarnissaanik atuuttussaatinneqarnissaanullu piunasaqaateqarnissamut oqaasertaliussami inatsisitigut tunngavissamik tamanut atuuttumik atuutsitsisoqalissasoq. Tamatuma kingorna taamaallaat oqaasertaliussami aalajangersimasumik inatsisitigut tunngaveqarneq, imaluunniit Naalakkersuisuniit akuersissummik pigisaqarneq takutinneqarsinnaappat, Kalaallit Nunaanni pigisamik aalaakkaasumik pisineq inatsisinik tunngaveqartutut atuuttussatullu isigineqarsinnaavoq.

Imm. 2-mut

Siunnersuutigineqarpoq, inuit danskisut innuttaassusillit Kalaallit Nunaanni pigisamik aalaakkaasumik pisisinnaasut. Tamatuma kingunerisaanik danskisut innuttaassusillit maanna inatsisitigut inissisimaneq assigalugu Kalaallit Nunaanni pigisanik aalaakkaasunik pisisinnaapput.

Imm. 3-mut

Siunnersuutigineqarpoq, inuit danskisut innuttaassuseqanngitsut ukiut kingullerni marlunni Kalaallit Nunaanni aalajangersimasumik najugaqarsimagunik, inuillu nalunaarsorsimaffianni nalunaarsorsimagunik aammalu Kalaallit Nunaanni tamakkiisumik akileraartussaasimagunik pigisanik aalaakkaasunik pisisinnaasasut. Kalaallit Nunaannut attuumassuteqarnissamut piunasaqaat taamaalilluni qaammatini qaangiuttuni 24-ni ataannartumillu Kalaallit Nunaanni

najugaqarsimanermi, kiisalu Kalaallit Nunaanni tamakkiisumik akileraartussaataasimanermi naammassineqarsimassaaq.

Ukiunut marlunnut piffissaliussaq piffissamit, inuup Kalaallit Nunaanni aalajangersimasumik najugaqartutut inuit nalunaarsorsimaffiannut nalunaarutigineqarneraniit naatsorsorneqassaaq. Ukiuni marlunni Kalaallit Nunaanni aalajangersimasumik najugaqarnissamut inuillu allattorsimaffianni nalunaarsorsimanissamut, kiisalu Kalaallit Nunaanni tamakkiisumik akileraartussaataanissamut piumasaqaat kingusinnerpaamik piffissami, pisisup tunisisullu Kalaallit Nunaanni pigisamik aalaakkaasumik pisinissaq pillugu inatsisitigut pituttuiffiusumik isumaqatigiissuteqarneranni naammassineqarsimassapput. Isumaqatigiisummi piumasaqaataasinnaasut atugassarititaasinnaasulluunniit, imaluunniit piffissaq pigisamik aalaakkaasumik tiguisiffiusoq isumaqartussaannngillat.

Suliffeqarfiit arlallit peqatigiillutik pigisamik aalaakkaasumik pisissappata, ukiuni marlunni Kalaallit Nunaanni aalajangersimasumik najugaqarnissamut, inuillu allattorsimaffianni nalunaarsorneqarsimanissamut, kiisalu Kalaallit Nunaanni tamakkiisumik akileraartussaataanissamut piumasaqaat piffissami, pisisup tunisisullu Kalaallit Nunaanni pigisamik aalaakkaasumik pisinissaq pillugu inatsisitigut pituttuiffiusumik isumaqatigiissuteqarneranni inunnit tamarmiusunit naammassineqarsimassapput.

Imm. 4-mut

Siunnersuutigineqarpoq, kreditinstitut-it aamma sillimmasiisarfiit, soraarnerussutisiassanut aningaasaateqarfiit aamma realkreditinstitut-tit, ilanngullugit inuunermut sillimmasiisarfiit kiisalu soraarnerussutisiassanut aningaasaateqarfiit Danmarkimi, Kalallit Nunaanni imaluunniit Savalimmiuni najugaqartut, Finanstilsynet-imit imaluunniit Tryggingareftirlitið-imit nakkutigineqartussat pigisanik aalaakkaasunik pisinnaassasut, tassungalu ilanngullugu pigisanik aalaakkaasunik qularnaveeqqutitut atorneqarsinnaasunik tiguisinnaassasut. Pigisamik aalaakkaasumik pisinermi aammattaaq ilaatinneqarpoq pinngitsaaliisummik akitsorterussinermi pisinissaq. Kisianni pigisamik aalaakkaasumik pinngitsaaliisummik akitsorterunneqartumik kingusinnerusukkut tunisineq, siunnersuummi maleruagassani nalinginnaasuni pineqartunut ilaatinneqassaaq.

Taamaalilluni aningaaseriviit realkredit-imillu taarsigassarsiniartarfiit Kalaallit Nunaanni pigisanik aalaakkaasunik niueruteqarnermut akuusutut ilaasinnaalernissaat, aammalu Kalaallit Nunaanni pigisanut aalaakkaasunut akinik pilersitsisarnerup neqerooruteqartitsisarnerullu patajaatsumik eqqoriaruminartumillu ingerlatiinnarneqarnissaannut iluaqutaasinnaanissaat pingaartinneqarpoq. Aammattaaq aningaasaqarnikkut sullissiviit taaneqartut, Aningaasaqarnermut ministereqarfimmit aamma Tryggingareftirlitið-imit nakkutigineqarnissaat pingaartinneqarpoq.

Taamatuttaa Namminersorlutik Oqartussat kalaallit pigisanik aalaakkaasunik niuerfiannut tunngatillugu aningaaserivinnik, realkredit-imik taarsigassarsiniartarfinnik aamma

anigaasaliisarnernut nakkutilliisunik pisortatigoortumik suleqateqarnissaat pingaartinneqarpoq. Kiisalu Namminersorlutik Oqartussat pensioninik katersuviit suleqatigalugit pensioninik katersuviit Kalaallit Nunaanni pigisanut aalaakkaasunut anigaasaliisarnissamut periarfissanik sinaakutissanillu misissuinissaat pingaartinneqarpoq.

Imm. 5-imut

Siunnersuutigineqarpoq, inuit siunnersuummi imm. 2-3 naapertorlugit Kalaallit Nunaanni pigisanik aalaakkaasunik pisisinnaatitaasut taamatuttaaq ingerlatseqatigiiffinnut anigaasaliiffiusunut, Kalaallit Nunaanni angerlarsimaffeqartunut anigaasaliissuteqarlutik piginnittuusinnaassasut, aammalu ingerlatseqatigiiffik anigaasaliiffiusoq Kalaallit Nunaanni pigisanik aalaakkaasunik pisitissinnaassagaat.

Ingerlatseqatigiiffiit anigaasaliiffiusut aktiat piginneqatigiiffiillu pillugit Inatsimmut (ingerlatseqatigiiffinnut inatsit) atasutut paasineqassapput, taakkunanilu ingerlatseqatigiiffiit piginneqatigiiffiusut aktianillu piginneqatigiiffiusut ilaatinneqarput.

Siunnersuutigineqarpoq, inuit, piffissami ingerlatseqatigiiffiup anigaasaliiffiusup Kalaallit Nunaanni pigisamik aalaakkaasunik pisisinnaalernerani ingerlatseqatigiiffimmi anigaasaatinik tamanik pigisaqassasut, aammalu ingerlatseqatigiiffimmi taasisinnaatitaanernik tamanik atuisinnaassasut.

Inuit anigaasaatinik pigisaqassapput toqqaannartumillu taasisinnaatitaassallutik, aammalu CVR-imi ingerlatseqatigiiffimmik anigaasaliiffiusumik inatsisit malillugit piviusumillu 100 %-inik piginnittutut nalunaarsorsimassallutik. Siunnersuummi ingerlatseqatigiiffinni allani anigaasaatit aqutugalugit toqqaannangitsumik piginnittuunissaq inerteqqutigineqarpoq. Taamaalilluni ingerlatseqatigiiffiup anigaasaliiffiusup Kalaallit Nunaanni pigisanik aalaakkaasunik pisisinnaaneranut atatillugu sapinngisamik annertunerpaamik ersarissumik pissusilersortoqarnissaa pingaartinneqarpoq.

Siunnersuutip kingunerisaanik ingerlatseqatigiiffik Kalaallit Nunaata avataani angerlarsimaffeqarsimappat, ingerlatseqatigiiffik Naalakkersuisut siumoortumik allakkatigut akuersissuteqarsimatinnagit Kalaallit Nunaanni pigisanik aalaakkaasunik pisisinnaanngilaq. Ingerlatseqatigiiffimmi anigaasaatit tamarmik inunnit, siunnersuummi imm. 2-3-mi ilaatinneqartunit pigineqaraluarpata tamarmillu taasisinnaatitaagaluarpata tamanna atuutissaaq.

Anigaasaatit, inunnit, siunnersuummi imm. 2-3 naapertorlugu Kalaallit Nunaanni pigisanik aalaakkaasunik pisisinnaasunit pigineqartut nalinginnaasumik qularnaveeqquusiissuteqarnermut atorneqarsinnaapput. Qularnaveeqquusiissutaasulli siunnersuummi imm. 12, saneqqutsinissamut tunngasoq naapertorlugu isumaqatigiissuteqarnermut ilaatinneqarsinnaanngillat.

Aningaasaatit tunngavigalugit taasisinnaatitaanerit, inunnit, siunnersuummi imm. 2-3 naapertorlugu Kalaallit Nunaanni pigisanik aalaakkaasunik pisisinnaasunit pineqartut qularnaveeqqusiissutigineqarsinnaanngillat tunniunneqarsinnaatilluunniit. Taamatuttaaq taasisinnaatitaaneq piginnaatitsissuteqarnikkut atorineqarsinnaanngilaq.

Imm. 6-imut

Siunnersuutigineqarpoq, inuit suliffeqarfiillu, aalisarnermut, aatsitassarsiornermut takornariaqarnermillu inatsisit atuuttut naapertorlugit Naalakkersuisut akuersissutaat tunngavigalugu ingerlatsisut pigisanik aalaakkaasunik, suliffeqarfimmut ilaasussanik pisinissamut periarfissaqassasut. Taamaalilluni akuersissummik tunniussinerimut atatillugu inuit suliffeqarfiilluunniit pineqartut, aammalu akuersissutit nalunaarutigineqartut tunniunneqartut pingaartinneqarput.

Aalajangersakkami pigisanik aalaakkaasunik, niuernerimut tunngaveqarnernik niueqateqarnermillu naliliinerit nalinginnaasut tunngavigalugit suliffeqarfimmut attuumassuteqartunik pisisarnerit pineqarput. Taakku saniatigut pigisanik aalaakkaasunik pisisarnerit allat aalajangersakkamut ilaatinneqanngillat. Assersuutigalugu suliffeqarfiup aatsitassarsiortup pigisamik aalaakkaasumik, inuussutissarsiutigalugu attartortitsinissaq siunertaralugu pisisinnaanera aalajangersakkamut ilaatinneqanngilaq.

Imm. 7-imut

Kalaallit Nunaanni pigisamik aalaakkaasumik pisineq aamma suliffeqarfiit, Kalaallit Nunaanni pigisamik aalaakkaasumik pigisaqareersut pigisat piginneqataassutilluunniit atorlugit qularnaveeqqusiinissamik, imaluunniit taasisinnaatitaanissamik siunertaqarluni pisinerisigut pisinnaavoq.

Siunnersuutigineqarpoq, aamma Kalaallit Nunaanni pigisamik aalaakkaasumik pisisinnaanermut suliffeqarfiit, Kalaallit Nunaanni pigisamik aalaakkaasumik pigisaqareersut pigisat piginneqataassutilluunniit atorlugit qularnaveeqqusiinissamik, imaluunniit taasisinnaatitaanissamik siunertaqarluni pisisarneri ilaatinneqassasoq. Siunnersuummi pisinerit tamarmik angissusii apequtaatinnagit, aammalu pisisup aalajangiiffiusumik sunnuteqarsinnaanera sunnuteqarsinnaannginneraluunniit apequtaatinnagu ilaatinneqarput. Pigisaq aalaakkaasoq tamakkiisumik ilaannaasumilluunniit, imaluunniit toqqaannartumik toqqaannangitsumilluunniit pigineqarnera siunnersuut atuutissaaq. Aamma siunnersuut suliffeqarfimmut suliffeqarfimmut allanik piginneqataasunut taasisinnaatitaasunulluunniit, Kalaallit Nunaanni pigisanik aalaakkaasunik pisisinnaatitaasunut atuutissaaq. Siunnersuutigineqarpoq, suliffeqarfiit Kalaallit Nunaanni pigisanik aalaakkaasunik pisisinnaatitaassappata, pigisanik aalaakkaasunik pigisassanik piginneqataassutinulluunniit qularnaveeqqusiussassanik, imaluunniit taasisinnaatitaassutissanik pisinissamut akuersissuteqartoqarnissaa piumasarineqassasoq, tamatumani pisisoq siunnersuummi imm. 2-6-imut ilaatinneqanngippat.

Siunnersuutip kingunerisaanik inuit suliffeqarfiilluunniit, siunnersuummi imm. 2-6 naapertorlugit Kalaallit Nunaanni pigisanik aalaakkaasunik pisisinnaatitaasut aamma suliffeqarfinni, Kalaallit Nunaanni pigisanik aalaakkaasunik pisisinnaatitaasuni piginneqataassutinik taasisinnaatitaanernillu pisisinnaassapput.

Imm. 8-mut

Inuit suliffeqarfiillu, siunnersuummi imm. 2-6-imut ilaatinneqanngitsut Kalaallit Nunaanni pigisamik aalaakkaasunik pisinissamut Naalakkersuisunut qinnuteqarsinnaapput. Allakkatigut qinnuteqaat pisiassatut eqqarsaatigineqartumut paasissutissanik, tamatumunngalu piumasaqaatinik ilaqartillugu Naalakkersuisunut nassiunneqassaaq. Naalakkersuisut qinnuteqartoq uppernarsaatinik paasissutissanillu allanik, qinnuteqaatip naliliiffigineqarneranut atorneqartussanik saqqummiusseqqullugu piumaffigisinnaavaat. Erseqqissaatigineqassaaq, qularnaveeqqusiisup Kalaallit Nunaanni pigisamik aalaakkaasunik, atorsinnaasunik qularnaveeqqusiissuteqarluni tigusinera Kalaallit Nunaanni pigisamik aalaakkaasunik pisinermut sanilliunneqartussaammat. Taamaattumik qularnaveeqqusiisooq, Kalaallit Nunaanni pigisamik aalaakkaasunik pisinissamut piumasaqaatinik naammassinnissimanngitsoq, tamatumunnga akuersissummik Naalakkersuisunut qinnuteqartussaavoq. Aalajangersagaq taarsigassarsititsisunit namminneerlutik Kalaallit Nunaanni pigisamik aalaakkaasunik pisisinnaanngitsunit atorneqarsinnaassaaq. Siunnersuummi Naalakkersuisut sulianik suliqaarnissaannut, aammalu Kalaallit Nunaanni pigisamik aalaakkaasunik pisinissamut akuersissuteqartoqarnissaanik qinnuteqaatinut aalajangiinissaannut tunngavissat sukumiisut eqqarsaatigisassalluunniit allassimanngillat. Tassani Kalaallit Nunaanni pigisanut aalaakkaasunut akinik pilersitsisarnerup neqerooruteqartitsisarnerullu patajaatsumik eqqoriaruminartumillu ingerlaannarnissaat pingaarnertut eqqarsaatigineqarput. Innuttaasut maani najugaqartut inissianik imminnut pilersorsinnaanissaasa, aammalu suliffeqarfinnik inuussutissarsiorfiusunik pilersitsisinnaanissaasa killilersorneqannginnissaa, aammalu nunanit allaneersut Kalaallit Nunaanni pigisanik aalaakkaasunik pisinerisa kingunerisaanik akisunerulersitsisoqannginnissaa pingaartinneqassapput.

Kalaallit Nunaanni pigisamik aalaakkaasunik pisinissamut akuersissummik qinnuteqaatip nalilersorneqarnerani, qinnuteqaatinik ataasiakkaanik ataasiakkaatigut nalilersuisoqartarpoq. Pigisamik aalaakkaasunik pisinissamut siunertaasooq, aningaasaqarnikkut sunniutaasussat aammalu najukkami pigisanut niuerfimmi sunniinissaaq, nalinginnaasunik nalilersorneqartarput. Nalinginnaasunik niuernikkut ingerlatsinissakkullu naliliisoqarnerooq, pigisamik aalaakkaasunik pigisaqalernissamut akuersissummik qinnuteqaammut tunngavissiisinnaasunik, ilaatinneqassaaq.

Pigisamik aalaakkaasunik nutaamik sanaartormik kinguneqartussamik qinnuteqarnermi, suliassaq najukkami suliffeqarnermut, illuliormik inuussutissarsiornermi pisinnaasanik atorluaasoqassanersoq kiisalu pigisamik aalaakkaasunik sanaartormut akigitat,

suliassamut qanoq sunniuteqarsinnaanersut, toqartussaannersoq Naalakkersuisut naliliinerani aammattaaq ilaatinneqarsinnaapput.

Aamma Naalakkersuisut allaffissornikkut sulinerminni Kalaallit Nunaata naalagaaffeqatigiinnerup iluani suleqatigiinnerit, nunat akornanni innuttaasut suleqatigiinneri, kiisalu nunani tamalaani pisussaaffiit, taamatullu Kalaallit Nunaanni nunami namminerimi aningaasaqarnikkut nunamilu pilersaarusiornikkut soqutigisat eqqarsaatigineqarnissaat pingaartissinnaavaat.

Kalaallit Nunaanni pigisamik aalaakkaasumik pisinissamut akuersissut immikkut ittunik atugassaqaartitsiffiusinnaavoq piumasaqaateqarfiusinnaallunilu, taamatullu aamma piffissamut killiliiffiusinnaavoq. Tamatumunnga qinnuteqaat aalajangersimasoq, taamatullu atugassarititaasut piumasaqaatillu suut Naalakkersuisunit pingaartinneqarneri apeqqutaatinneqassapput.

Assersuutigalugu nunanit allaneersut illunik attartortittakkanik inissiartalinnik pisinissaannut akuersissuteqartoqassappat, pisineq assersuutigalugu illup attartortittakkatut allannortinnagu atorineqarnissaa, aammalu inissianut nammineerluni pigisassanut allannortinneqarsinnaanginnissaa piumasaqaatigineqarsinnaavoq. Assersuutigalugu akuersissummi aamma pisisup najugaqartussaataaannissaa piumasarineqarsinnaavoq. Pisisoq, Kalaallit Nunaanni pigisamik aalaakkaasumik pisisinnaatitaasoq ingerlatseqatigiiffiuppat aningaasaliiffiusoq, imaluunniit suliffeqarfiuppat alla, akuersissummi assersuutigalugu piginnittut pisortalluunniit allannortinneqannginnissaa, imaluunniit suliffeqarfiup siunertaata allannortinneqannginnissaa piumasaqaatigineqarsinnaavoq.

Kiisalu pisisup atugassarititaasunik piumasaqaatinillu unioqquitsinerani, imaluunniit akuersissutip piffissalikkap naanerani Kalaallit Nunaanni pigisamik aalaakkaasumik tunisinissamut pisussaaffilerneqarnissaanut piumasaqaammik aalajangersaasoqarsinnaavoq. Naalakkersuisut Kalaallit Nunaanni pigisamik aalaakkaasumik pisinissamut akuersissutaanni, pisisup inatsimmi attuumassutilimmi allami piumasaqaatinik atugassarititaasunillu eqqarsaatigineqarnissaa atorunnaarsinneqanngilaq.

Imm. 9-mut

Inatsimmi siunertaasoq eqqarsaatigalugu Kalaallit Nunaanni pigisanik aalaakkaasunik pisisinnaatitaanerup ilaqutariit akornanni kingornussinikkut, pigisanik avitsinikkut tunissuteqarnikkulluunniit killilerneqarnissaa tunngavissaqartutut isigineqanngilaq.

Imm. 10-mut

Naalakkersuisut Kalaallit Nunaanni pigisanik aalaakkaasunik pisinissamut akuersissutaat ullormit akuersissutip tunniunneqarfianit atuutilissaaq. Naalakkersuisut allakkatigit akuersissutaata piareernissaa sioqqullugu isumaqatigiissuteqartoqarsimappat isumaqatigiissut

atuutissanngilaq, aammalu isumaqatigiissuteqartut akornanni imaluunniit inummut allamut, taakkunungalugu pisortani oqartussaasut ilanngullugit, inatsisit atuuttussaatinneqassanngillat. Naalakkersuisut Kalaallit Nunaanni pigisamik aalaakkaasumik pisinissamut akuersissutaat kingumoortumik atuuttussanngorlugu nalunaarutigineqarsinnaanngilaq, taamaalillunilu isumaqatigiissutip atuuttussanngitsup kingumoortumik atuuttussanngorlugu nalunaarutigineqarnissaa inatsisitigut tunngavilerneqarsinnaanani. Taamaattumik isumaqatigiissut atuuttussanngitsaq aatsaat isumaqatigiissuteqartut akornanni imaluunniit inummut allamut ullormit akuersissutip suliarineqarfianit atuuttussanngortinneqarsinnaavoq.

Imm. 11-mut

Siunnersuummi imm. 10-mi allassimavoq, siunnersuummi aalajangersakkanik allanik unioqquitsilluni Kalaallit Nunaanni pigisamik aalaakkaasumik pisinissaq pillugu isumaqatigiissuteqarneq atuuttussaatinneqassanngitsaq. Taamaattoqartillugu tunngaviummik allanik iliuseqartoqassanngilaq.

Kalaallit Nunaanni pigisamik aalaakkaasumik pisinermi piginnittuunermut uppersaammik uppersaammilluunniit allamik Kalaallit Nunaanni Eqqartuussivimmut nalunaarsuititsinissaq pisussaffiunngilaq. Kisiannili siunnersuutigineqarpoq, ileqqorissaarnissaq eqqarsaatigalugu Kalaallit Nunaanni Eqqartuussivik Kalaallit Nunaanni pigisamik aalaakkaasumik pisinermik nalunaarsuititsinissamut uppersaatinik tigusinermini itigartitsisassasq, pisisoq pisinermut uppersaat malillugu siunnersuummi imm. 2-6-imi imaluunniit imm. 9-mi ilaangippat, imaluunniit siunnersuummi imm. 8 malillugu akuersissummik peqanngippat.

Taamatuttaaq siunnersuutigineqarpoq, nunaminertanik atugassiisarnermut oqartussaasut Kalaallit Nunaanni nunaminertanik atuisinnaanermut qinnuteqaatinik suliaqarnermini, qinnuteqartoq siunnersuummi imm. 2-6-imi imaluunniit imm. 9-mi ilaangippat, imaluunniit siunnersuummi imm. 8 malillugu akuersissummik peqanngippat itigartitsisassasut.

Imm. 12-imut

Kalaallit Nunaanni pigisamik aalaakkaasumik pisinissamut killilersuutinik saneqquteriaraluartunik peqartoqarnissaa mattunneqarsinnaanngilaq. Taakku nalinginnaasumik atuisinnaanermut attartornermullu isumaqatigiissutinut, piumasaqaatit nalinginnaanngitsut tunngavigalugit sivirusumik atuuttussanut, imaluunniit sinniisinik (amerlanertigut atuuttussaatitatut taaneqartartunik), tunngaviummik siunnersuummi imm. 2-6-imi piumasaqaatinik naammassinnittunik atuinermut tunngasinnaapput.

Pigisamik aalaakkaasumik attartornissaq imaluunniit atuisinnaatitaanissaq pillugu sivirusunerusumik sivirususilimmut isumaqatigiissuteqartoqarsimanagera, imminermini avaqutaarinerusussaannngilaq

Tamatumani pissutsinik tamarmiusunik, taakkunungalu soorunami isumaqatigiissutitut tunngaviusunik, akiliisarnernik aningaasalersuisarnernillu, aammalu isumaqatigiissummi illuatungiliuttutut akuusunik, saneqqutsiniartutut ilimagineqartunik aalajangersimasumik naliliinissaq apeqqutaatinneqassaaq.

Pigisamik aalaakkaasumik pisinissamik, tassungalu ilanngullugu inatsisit aaqqissuussaaneritut tunngassuteqartut pillugit naliliinermut aningaasaliissutaasut annikinnerinik isiginiagaqarnissaq ilaatinneqarsinnaavoq, tak. isertitanut akileraarutit pillugit Inatsisartut inatsisaanni tamanna pillugu maleruagassat. Aamma siumoortumik suliassamik akiliisinnaassutsimillu nalinginnaasumik naliliisoqarsimanera, aammalu nalinginnaasumik toqqissisimanartumillu isumannaassuseqartumik aningaasaliisoqarsimanera uppersarsarneqarsinnaanersoq naliliinermut ilaatinneqarsinnaavoq.

Imm. 13-imut

Siunnersuutigineqarpoq, siunnersuummi Kalaallit Nunaanni pigisamik aalaakkaasumik pisisinnaanissamat killilersuutit aamma Kalaallit Nunaanni nunaminertamik atuisinnaanermut qinnuteqaatinut atuutsinneqassasut.

Siunnersuummi aalajangersakkat, tassungalu ilanngullugit imm. 2-6 aamma imm. 9, kikkut Kalaallit Nunaanni pigisanik aalaakkaasunik pisisinnaaneritut tunngasut, taamatuttaaq Kalaallit Nunaanni nunaminertamik atuisinnaatitaaneq pillugu qinnuteqaatinut atorneqartassasut.

Siunnersuutigineqarpoq, sumiiffinni aammalu teknikkimut atortulersuutitut, illersornissami siunertaqarfiusunut atorneqartuni nunaminertanik atugassiisarnertit allanngortinneqaratik, naalagaaffimmi oqartussaasut Naalakkersuisut isumaqatiginninniareernerini, aammalu siunnersuummi aalajangersakkat atuutsinneqaratik aalajangiiffigineqartassasut. Tassani aamma siunnersuummi imm. 15-ip immikkoortua 1 malinneqassaaq, kisiannili inatsisitigut inissisimanermi nalornissutaalersinnaasut paasinarsarniarlugit maleruagassiuussinissaq siunnersuutigineqarpoq.

Imm. 14-imut

Siunnersuummi aalajangersakkat Namminersorlutik Oqartussanut, naalagaaffimmut imaluunniit Kalaallit Nunaanni kommuninut atuutissanngitsut erseqqissaatigineqarpoq. Aamma atuutsisisussaanginnermut pisortani oqartussaasut attuumassutillit ilaatinneqarput. Erseqqissaatigineqassaaq, siunnersuummi aalajangersakkanut Kalaallit Nunaanni pigisanik aalaakkaasunik pisisinnaatitaanerit imaluunniit Kalaallit Nunaanni nunaminertanik atuisinnaatitaanerit, Kunngaqarfik Danmarkimi Naalakkersuisut aamma Amerikami Naalagaaffiit Peqatigiit akornanni Kalaallit Nunaanni illersornissaq pillugu Nunat Imarpiup Avannaaniittut Isumaqatigiissut naaportorlugu Isumaqatigiissummi (Kalaallit Nunaata illersorneqarnissaa pillugu isumaqatigiissut) ilaatinneqartunik siunertaqarfiusut ilaatinneqanngimmata.

Erseqqissaatigineqassaaq, siunnersuummi aalajangersakkanut Pituffimmi Illersornissaqarfik ilaatinneqanngimmat.

Imm. 15-imut

Siunnersuutigineqarpoq, siunnersuut nittartagaq www.nalunaarut.gl aqqutigalugu nalinginnaasumik nalunaaruteqartoqarneratigut, aammalu atuutsitsilernerup kingorna Kalaallit Nunaanni pigisamik aalaakkaasumik pisinissamut isumaqatigiittoqarneratigut atuutilersumik, atuutsitsilernerullu kingorna Kalaallit Nunaanni nunaminertanik atuisinnaatitaanissamut qinnuteqaateqartoqarneratigut atuutilissasoq.

Oqaasertaliussa q nutaajuvoq.”